

Član 4.

Budžetskim korisnicima, za koje u ovom Budžetu nisu predviđena sredstva ili su predviđena u nedovoljnom iznosu, a kod kojih se ukaže neodložna potreba za sredstvima, predviđena je tekuća rezerva.

Sredstva iz tekuće rezerve, po predhodno podnesenom zahtjevu, odobrava Vlada Bosansko-podrinjskog kantona Goražde. U tekuću rezervu Budžeta izdvojiti će se 0,51 % tekućih prihoda Budžeta.

Član 5.

Prihodi i rashodi utvrđeni Odlukom o privremenom finansiranju-podrinjskog kantona Goražde za period januar-mart 2002 godine ("Službene novine Bosansko-podrinjskog kantona Goražde" br. 20/01), sastavni su dio Budžeta Bosansko-podrinjskog kantona Goražde.

Član 6.

Ovlašćuje se Ministarstvo finansija da izvrši tehničke ispravke u tekstu Budžeta.

Član 7.

Ovaj Budžet stupa na snagu danom objavljivanja u "Službenim novinama Bosansko-podrinjskog kantona Goražde", a primjenjivat će se od 01. januara 2002. godine.

Broj: 01-14-151/02  
15.04.2002 godine  
Goražde

PREDSJEDAJUĆI  
Ramiz Drakovac, s.r.

98

Na osnovu Poglavlja IV, odjeljak A, člana 32 /1/ Ustava Bosansko-podrinjskog kantona Goražde /Prečišćeni tekst/, /"Službene novine Bosansko-podrinjskog kantona Goražde", broj: 8/98/, d o n o s i m:

U K A Z  
O PROGLAŠENJU ZAKONA O RADIO-TELEVIZIJI  
GORAŽDE

I

Proglašava se Zakon o Radio-televiziji Goražde, koji je donijela Skupština Bosansko-podrinjskog kantona Goražde, na sjednici 8. aprila 2002. godine.

Broj: 02-02-164/2002  
8. april 2002. godine  
Goražde

PREDSJEDNIK  
Halilović Salem, s.r.

99

ZAKON  
O RADIO-TELEVIZIJI BOSANSKO-PODRINJSKOG  
KANTONA GORAŽDE

Član 1.

Ovim zakonom uređuju se pitanja u vezi osnivanja i organizacije Radio-televizije Bosansko-podrinjskog kantona Goražde (u daljem tekstu: RTV Goražde), naziv preduzeća, djelatnost, organi RTV Goražde, njen program, načela ekonomske propagande i sponzoriranja, način finansiranja i druga pitanja u vezi njene djelatnosti.

Član 2.

Zakon o preduzećima se primjenjuje na rad i djelatnost RTV Goražde ako ovim zakonom nije drugačije određeno.

RTV Goražde dužna je u potpunosti pridržavati se "Kodeksa za uređivanje televizijskog i radio programa", kao i drugih akata donesenih od strane Nezavisne komisije za medije (CRA), u skladu sa ovim zakonom, drugim propisima, statutom i drugim općim aktima RTV Goražde.

OSNIVANJE RTV BPK

Član 3.

Radi ostvarivanja prava konstitutivnih naroda zajedno sa ostalima kao i prava građana Bosansko-podrinjskog kantona Goražde (u daljem tekstu: Kanton) na informiranje, kao i zadovoljavanje njihovih kulturnih, obrazovnih i drugih potreba, Skupština BPK Goražde (u daljem tekstu: Skupština), osniva javni servis u skladu sa Zakonom o medijima za prenos i emitiranje programa RTV Goražde.

Član 4.

Naziv preduzeća je Javno preduzeće "Radio-televizija Bosansko-podrinjskog kantona Goražde". Skraćeni naziv preduzeća je RTV Goražde.

Sjedište RTV Goražde je u Goraždu.

Član 5.

Osnivački kapital RTV Goražde iznosi 10.000,00 KM u novcu kao i sredstva i oprema za proizvodnju i emitiranje programa. Osnivački kapital u novcu osigurava se iz Budžeta kantona.

Član 6.

Djelatnost, kojom RTV Goražde ispunjava zadatke iz člana 3. stav 1. ovog zakona je:

1. pripremanje, proizvodnja, reprodukovanje, difuzija i prijenos vlastitih radio i televizijskih programa namjenjenih javnosti u BPK.
2. prijenos i difuzija radio i televizijskih programa drugih radio-televizijskih stanica u zemlji i svijetu za javnost u BPK Goražde.
3. učesće u zajedničkim programima radio i televizijskih stanica u Bosni i Hercegovini u saradnji sa Radio-televizijom BiH na ekonomskoj osnovi i u skladu sa tehničkim mogućnostima.
4. arhiviranje fonografskih i videografskih zapisa.

Statutom RTV Goražde mogu se odrediti i druge djelatnosti, pod uslovom da nisu u suprotnosti sa osnovnom djelatnošću RTV Goražde određenom ovim zakonom.

Član 7.

RTV Goražde može stvarati i razvijati i vlastitu mrežu za prijenos i emitiranje programa.

Član 8.

RTV Goražde je ovlaštena da prenosi programe putem zemaljske mreže ili bilo kog drugog tehničkog sredstva, kako je to naznačeno u dozvoli za rad Nezavisne komisije za medije (u daljem tekstu: CRA) ili njenog nasljednika.

RTV Goražde može davati i usluge teleteksta, kao i angažirati se na svakom polju tehnologije emitiranja programa.

## Član 9.

RTV Goražde može objavljivati i distribuirati štampani materijal koji se odnosi na njen program ili na druga pitanja proizvodnje i emitiranja radio i televizijskog programa.

## Član 10.

Pored obaveza utvrđenih ovim zakonom, u cilju unapređivanja preostalog vremena emitiranja RTV Goražde može pružati dodatne programske usluge.

U cilju osiguranja dodatnih programskih usluga iz stava 1. ovog člana RTV Goražde može saradivati sa drugim pravnim i fizičkim osobama ili sticati članstvo u istim.

## Član 11.

RTV Goražde može osnivati ovisna preduzeća kao i ostvarivati interes u profitabilnim i neprofitabilnim organizacijama čije se aktivnosti odnose na funkcije RTV Goražde, posebno na područjima proizvodnje, korištenja i distribucije programa, uz saglasnost osnivača.

## Član 12.

Aktivnost RTV Goražde iz člana 10. i 11. ovog zakona moraju biti u skladu sa djelatnošću RTV Goražde.

## Član 13.

RTV Goražde je dužna organizirati prikupljanje, čuvanje i arhivsku obradu svih proizvedenih i prikupljenih audio-vizuelnih snimaka na savremen način arhiviranja, u skladu sa Zakonom.

Klasifikacija i kategorizacija audio-vizuelnih snimaka određivaće se u zavisnosti od njihove kulturne, istorijske i programske vrijednosti.

Zaštita i korištenje audio-vizuelnih snimaka osiguraće se posebnim općim aktom.

## III PROGRAM RTV GORAŽDE

## Član 14.

RTV Goražde neće obavljati bilo kakve operacije emitiranja programa izuzev onih koje su navedene u dozvoli ili dozvolama koje je izdala Nezavisna komisija za medije ili njen nasljednik. CRA će razmotriti i preduzeti aktivnosti na zahtjevima za dozvolu RTV Goražde u skladu sa odredbama ovog zakona i sa pravilima i propisima CRA. Od RTV Goražde će se tražiti da sačini periodične informacije i ostale podneske po zahtjevu CRA u unapređivanju njegovih odgovornosti u vezi sa izdavanjem dozvole RTV Goražde ili koji inače proističu iz Zakona. Ispunjavanje odredbi ovog zakona od strane RTV Goražde je neophodan uslov za odobravanje ili produžavanje dozvole za emitiranje RTV Goražde od strane CRA.

RTV Goražde je dužna osigurati visoko kvalitetan i raznovrstan program.

## Član 15.

Program RTV Goražde mora služiti interesima javnosti i obuhvatati, naročito, informiranje, obrazovanje, kulturu umjetnost, sport i zabavu.

Program RTV Goražde proizvodi se i uređuje na način koji odaje poštovanje umjetničkih i

stvaralačkih sloboda i koji je u skladu sa profesionalnim kriterijima.

Program ne smije biti u funkciji povlaštenih ili uskih interesa bilo koje organizacije, grupe, političke stranke, udruženja, religije ili ideologije.

## Član 16.

RTV Goražde će od CRA zatražiti dozvolu za emitiranje svog programa na jednom radio-kanalu i jednom televizijskom kanalu koji moraju biti jednako dostupni korisnicima (slušaocima i gledaocima) na cijeloj teritoriji BPK i čiji programi moraju odgovarati standardima koji važe za javnu radio-televiziju.

## Član 17.

Programski sadržaji moraju biti zasnovani na istini, poštivanju ljudskog dostojanstva i različitosti mišljenja i uvjerenja, te promovirati najviše standarde i načela o ljudskim pravima, miru i socijalnoj pravdi, međunarodnom razumijevanju, zaštiti demokratskih sloboda i zaštiti okoline.

Programske šeme za kanale radija i televizije utvrđuju se na nivou RTV Goražde.

## Član 18.

Informativne emisije moraju biti nepristrasne, sveobuhvatne i nezavisne od bilo čijih utjecaja, uključujući političke i vjerske utjecaje, i uradene u skladu sa profesionalnim standardima.

Prije njegovog emitiranja, istinitost, porijeklo i sadržina materijala će se provjeriti sa profesionalnom pažnjom.

Komentari moraju biti jasno odvojeni od informacija.

## Član 19.

U svojoj uređivačkoj politici, RTV Goražde je dužna posebno voditi računa o nacionalnoj strukturi stanovništva na teritoriji BPK, te promovirati raznovrsnost i bogatstva njenih kultura, religija i običaja.

Najmanje jedna četvrtina programa koji se emitira u toku dana mora se sastojati od emisija koje su proizvedene u BPK Goražde.

## Član 20.

Program ne smije, direktno ili indirektno, poticati nacionalnu, vjersku ili rasnu mržnju, ili bilo kakvu vrstu neravnopravnosti među ljudima, kao ni pozvati na nasilje, nered i nemire ili izvršenje krivičnih djela.

## Član 21.

U programu ne smiju biti zastupljeni pornografija ili sadržaji koji pokazuju nasilje na neprikladan način.

Programski sadržaji koji bi mogli negativno utjecati na maloljetnike (štetiti njihovom emocionalnom, moralnom, fizičkom ili mentalnom razvoju) ne smiju biti emitirani u vremenu od 06-23 sata.

## Član 22.

Zaposleni u RTV Goražde koji uređuju programe RTV Goražde dužni su pridržavati se zakona, statuta RTV Goražde i akata kojima su utvrđeni načini obavljanja posla (uređivačka politika, kodeksi usvojeni na nivou RTV Goražde i dr.).

Općim aktom RTV Goražde utvrđuje se disciplinski postupak u slučaju povrede akata iz stava 1. ovog člana od strane zaposlenih na RTV Goražde.

#### Član 23.

Niko ne smije protiv RTV Goražde i osoba koje u njoj radi upotrijebiti bilo kakvu vrstu nasilja, pritiska ili zastrašivanja, niti na bilo koji način nezakonito ograničavati slobodu javnog informiranja.

#### Član 24.

Svaka fizička i pravna osoba ima pravo podnijeti RTV Goražde primjedbe i sugestije u vezi sa njenim programom.

RTV Goražde dužna je osigurati naučno utemeljenu i praktično provodivu provjeru slušanošći i gledanosti svog programa uzimajući u obzir primjedbe i sugestije gledalaca i slušalaca iz stava 1 ovog člana, i preduzimati odgovarajuće mjere.

### IV PRISTUP INFORMACIJAM I POVJERLJIVOST NOVINARSKIH IZVORA

#### Član 25.

RTV Goražde je ovlaštena da prenosi zasjedanje Skupštine BPK Goražde u skladu sa njenim aktima.

U toku izborne kampanje, RTV Goražde je dužna omogućiti političkim strankama i kandidatima da predstave svoje izborne programe pod ravnopravnim uslovima.

#### Član 26.

Zagarantovana je povjerljivost izvora informacija koje novinari RTV Goražde koriste za svoje izvještaje.

Otkrivanje izvora informacija može naložiti samo nadležni sud.

### V EMITIRANJE NA OSNOVU ZAHTJEVA

#### Član 27.

RTV Goražde će, bez odlaganja i naknade, objaviti saopćenja organa vlasti i međunarodne zajednice, čije je objavljivanje hitne prirode i od posebnog značaja za građane, a posebno saopćenja o opasnostima po život i zdravlje ljudi, imovinu, bezbjednost, javni red i mir.

#### Član 28.

RTV Goražde može odbiti emitiranje programa u skladu sa zakonom, drugim propisima i općim aktima.

### VI PRAVO NA ODGOVOR I ISPRAVKU

#### Član 29.

Fizička i pravna osoba na koju se odnose navodi izrečeni u emisijama RTV Goražde imaju pravo na odgovor ili ispravku u roku od 30 dana od dana emitiranja.

Odgovor i ispravka moraju iti u pismenoj formi i svedeni na činjenice.

Ako je fizička osoba na koju se navodi odnose umrla pravo na objavljivanje odgovora ili

ispravke imaju njegov bračni drug, djeca, roditelji, braća i sestre, te usvojlac, usvojenik, staralac i štitićenik.

#### Član 30.

RTV Goražde dužna je emitirati odgovor, odnosno ispravku što je prije moguće, na način i u vremenu kako je dato obavještenje na koje se odgovor odnosno ispravka odnose.

Odgovor i ispravka moraju se objaviti bez izmjena i bez plaćanja naknade.

Ako su odgovor ili ispravka nesrazmjerno dugi; RTV Goražde će zatražiti od podnosioca da ih skрати u roku od pet dana od dana dostavljanja traženja, a ako ovaj to ne učini, RTV Goražde će sama izvršiti skraćenje radi emitiranja.

#### Član 31.

U slučaju da RTV Goražde odbije objaviti odgovor ili ispravku, ili ih ne objavi u roku i na način određen zakonom, podnosilac ima pravo, u roku od 15 dana od isteka roka za objavljivanje odgovora ili ispravke, uputiti zahtjev CRA za disciplinsku mjeru u skladu sa dozvolom RTV Goražde. CRA će donijeti odluku po ovom pitanju u skladu sa svojim Poslovníkom i svrhom ovog zakona i ukoliko zaključí da RTV Goražde nije postupila u skladu sa odredbama i svrhom ovog zakona nametnuće sankcije koje smatra pravičnim. Nakon donošenja konačne odluke CRA po zahtjevu podnesenom u skladu sa ovim članom oštećena strana može pokrenuti upravni spor pred nadležnim sudom.

#### Član 32.

Odgovornost za sadržaj iz člana 31 ovog zakona snose podnosioci zahtjeva.

### VII OSIGURANJE DOKAZA

#### Član 33.

RTV Goražde dužna je praviti potpune snimke svih radio i televizijskih emisija i takve snimke čuvati najmanje 30 dana od dana emitiranja.

Svaka fizička ili pravna osoba koja ima pravni interes ima pravo tražiti da mu se, na njegov trošak izda kopija snimka.

Zahtjev iz stava 2 ovog člana mora biti u pismenoj formi i obrazložen. U slučaju pokretanja sudskog spora; RTV Goražde je dužna čuvati snimak sve do donošenja sudske odluke.

#### Član 34.

Odredbes ovog zakona o pravu na odgovor i ispravak shodno se primjenjuju na zahtjev za izdavanje snimka.

### VIII MARKETING

#### (A)- Ekonomska propaganda

#### Član 35.

Pod ekonomskom propagandom u smislu ovog zakona podrazumijeva se oglašavanje namijenjeno promoviranju prometa proizvoda i usluga ili radi postizanja drugih efekata po želji naručioaca, za koje RTV Goražde po ugovorenoj naknadi, daje određeno vrijeme u svom programu.

Član 36.

Zabranjen je bilo kakav utjecaj naručioca emitiranja ekonomske propagande na sadržinu programa, van njegove poruke.

Član 37.

Ekonomska propaganda treba biti jasno odijeljena od ostalih programskih sadržaja i, u pravilu, emitira se u posebnim blokovima.

Član 38.

Ekonomsko-propagandne poruke ne smiju biti duže od 4 minute unutar jednog sata programa, niti ukupno od 7% ukupnog programa.

Izuzetno od odredbe stava 1 ovog člana, ekonomsko-propagandne poruke mogu biti emitirane u blokovima u dužem trajanju nakon završetka emitiranja programa za određeni dan.

(B)- Sponzoriranje

Član 39.

Pod sponzoriranjem u smislu ovog zakona podrazumijeva se učesće pravne ili fizičke osobe van RTV Goražde u izravnom ili posrednom finansiranju programa, u cilju promoviranja preduzeća, imena ili ukupne predstave o toj osobi.

Sponzoriranje programa mora biti jasno označeno i ne smije imati utjecaja na sadržinu programa.

Sponzoriranje emisija vijesti nije dozvoljeno.

(C)- Cjenovnik usluga

Član 40.

Cjenovnik usluga marketinga (ekonomske propagande i sponzoriranja) utvrđuje se na nivou RTV Goražde.

Član 41.

Emitiranje ekonomsko - propagandnih poruka i sponzoriranje detaljnije će se urediti posebnim općim aktom RTV Goražde.

IX ORGANI RTV Goražde

Član 42.

Organi RTV Goražde su sljedeći:

- a) Vijeće RTV Goražde
- b) Nadzorni odbor
- c) Direktor RTV Goražde

U sastavu svih organa RTV Goražde, kao i prilikom imenovanja urednika i svih nosilaca funkcija sa posebnim ovlaštenjima vodit će se računa o nacionalnoj zastupljenosti konstitutivnih naroda koji žive na prostoru BPK Goražde.

(A) - Vijeće RTV Goražde

Član 43.

Vijeće RTV Goražde je organ putem kojeg se na način određen ovim zakonom ostvaruje interes javnosti za rad RTV Goražde.

Vijeće RTV Goražde:

1. Utvrđuje programsku politiku (principe, tematsku usmjerenost, obim i strukturu) u skladu sa zakonom i nadzire njeno ostvarivanje;
2. Osigurava odgovarajuću nacionalnu strukturu zaposlenih;
3. Donosi Statut RTV Goražde, kodekse, opće akte o emitiranju ekonomsko-propagandnog programa i naplati pretplate i druge opće akte;
4. Utvrđuje programske šeme RTV Goražde (član 17 stav 2);
5. Donosi finansijski plan i godišnji finansijski izvještaj i periodične obračune;
6. Odobrava zaključivanje ugovora kojim bi se RTV Goražde zadužila iznad iznos od 1.000,00 KM;
7. Odobrava osiguranje dodatnih programskih usluga (član 9);
8. Odlučuje o izboru logotipova RTV Goražde i kanala;
9. Imenuje članove Nadzornog odbora;
10. Imenuje i razrješava direktora;
11. Vršiti druge obaveze utvorene zakonom i Statutom;
12. Podnosi zahtjev CRA za dozvolu za rad, podržava i osigurava njeno poštivanje.

U periodu dok je BPK Goražde jedini vlasnik RTV Goražde, Vijeće vrši i funkciju u skladu sa zakonom.

Član 44.

Vijeće RTV Goražde ima 5 članova, koje bira Skupština Bosansko-podrinjskog kantona Goražde.

Jedan član Vijeća RTV Goražde kandidira se iz reda uposlenih.

Svi članovi Vijeća RTV Goražde imaju mandat od četiri godine, koji se može produžiti samo jednom.

U toku svog mandata članovi Vijeća RTV Goražde mogu biti smjenjeni na osnovu Odluke Skupštine Bosansko-podrinjskog kantona, prije isteka mandata.

Član 45.

Sastav Vijeća RTV Goražde mora održavati princip nacionalne ravnopravnosti i zastupljenosti u BPK Goražde, a kod izbora članova Vijeća vodi se računa i o stručnoj, polnoj, vjerskoj i drugoj strukturi stanovništva.

Član 46.

Vijeće RTV Goražde bira iz svog sastava predsjednika.

Vijeće RTV Goražde donosi Poslovnik o svom radu, kojim se kod donošenja odluka o pitanjima od značaja za nacionalne interese mora osigurati zaštita tih interesa u skladu sa Ustavom BPK Goražde.

(B) - Nadzorni odbor

Član 47.

Nadzorni odbor:

1. donosi opći akt o finansijskom poslovanju RTV Goražde,

2. donosi opći akt o disciplinskom postupku;
3. u ime RTV Goražde zaključuje ugovor o radu sa generalnim direktorom;
4. odobrava osnivače podružnica i ostvarivanje interesa u drugim pravnim osobama (član 11);
5. donosi cjenovnik marketinških usluga;
6. predlaže finansijski plan i godišnji finansijski izvještaj i periodične obračune;
7. donosi opći akt o arhiviranju proizvedenih i prikupljenih fonografskih i videografskih zapisa;
8. vrši druge poslove određene Statutom.

Nadzorni odbor nema ovlaštenja u pitanjima koja se odnose na programe Radija ili Televizije.

#### Član 48.

Nadzorni odbor ima tri člana.

Mandat Nadzornog odbora je četiri godine.

U Nadzorni odbor ne mogu biti birani članovi Skupštine BPK Goražde i Vlade kantona, Vijeća RTV Goražde, niti osobe koje zakonom ne mogu vršiti tu funkciju.

Mandat člana Nadzornog odbora koji je izabran umjesto člana kojem nije bio istekao mandat traje do isteka mandata predhodnog člana.

#### (C) - Direktor RTV Goražde

##### Član 49.

Direktor zastupa i predstavlja RTV Goražde.

Direktor je odgovoran za zakonitost rada RTV Goražde, a naročito za poštovanje programskih principa utvrđenih zakonom i odlukama vijeća RTV Goražde.

Direktor postavlja urednika Radija i urednika Televizije.

Direktor RTV Goražde, donosi opći akt kojim se uređuje postupak i način ostvarivanja prava na emitiranje programa po zahtjevu.

Direktor obavlja i druge poslove određene zakonom, Statutom i drugim općim aktima RTV Goražde.

##### Član 50.

Mandat direktora je četiri godine, a može se obnoviti samo još jednom.

#### (D) - Urednik RTV Goražde

##### Član 51.

Radio i Televizija, svaki zasebno, imaju urednika.

Urednik je odgovoran za ukupnu programsku orijentaciju, kao i za svaku informaciju objavljenu u programu, osim saopćenja iz člana 29. ovog zakona.

Radio i Televizija mogu imati više odgovornih urednika za pojedine segmente programa.

## X - STATUT I DRUGI OPĆI AKTI RTV GORAŽDE

### Član 52.

Statutom RTV Goražde, u skladu sa zakonom, uređuju se:

1. adresa sjedišta u Goraždu;
2. druge djelatnosti;
3. način odlučivanja Vijeća;
4. nadležnost i način odlučivanja Nadzornog odbora;
5. unutrašnja organizacija RTV Goražde i rukovođenje;
6. nazivi kanala;
7. pravila raspodjele finansijskih sredstava unutar RTV Goražde;
8. ovlaštenja i obaveze direktora;
9. ovlaštenja i obaveze glavnog i odgovornog urednika i urednika programa;
10. dužnosti i prava zaposlenih;
11. način utvrđivanja visine naknade za rad članova Vijeća i Nadzornog odbora;
12. odnosi sa sindikatom;
13. čuvanje povjerljivih informacija;
14. druga pitanja od značaja za rad RTV Goražde, uključujući bez ograničenja, način sticanja dozvole za rad od CRA.

Saglasnost na statut daje osnivač RTV Goražde.

### Član 53.

Drugi opći akti RTV Goražde donose se u skladu sa zakonom i Statutom RTV Goražde.

## XI FINANSIRANJE

### Član 54.

RTV Goražde se finansira prihodima od ekonomske-propagande, sponzoriranja i donacija, pružanjem usluga iz okvira svoje djelatnosti, kao i na drugi način, u skladu sa Zakonom i Statutom.

U slučaju da prihod RTV Goražde ostvaren nije dovoljan za ostvarivanje njene redovne djelatnosti, što utvrđuje Vijeće RTV Goražde, RTV Goražde može se dopunski finansirati iz kantonalnog budžeta do sredstava predviđenih u Budžetu.

Iz kantonalnog budžeta mogu se finansirati i programski projekti od posebnog značaja za BPK Goražde.

Finansiranje izgradnje prijenosne i emisione mreže i ključnih infrastrukturnih objekata RTV Goražde, kao i arhivske djelatnosti iz člana 13. ovog zakona, obaveze su BPK Goražde.

## XII PRELAZNE I ZAVRŠNE ODREDBE

### Član 55.

Skupština BPK Goražde će izabrati članove Vijeća RTV Goražde u roku od 30 dana od dana stupanja na snagu ovog zakona.

Do konstituisanja Vijeća RTV Goražde u skladu sa ovim zakonom, njegovu funkciju određenu ovim zakonom, vršit će privremeni Upravni odbor.

## Član 56.

Vijeće RTV Goražde imenovat će direktora i u skladu sa ovim zakonom, najkasnije u roku od 30 dana od dana izbora Vijeća.

## Član 57.

Statut i drugi opći akti RTV Goražde donijet će se najkasnije u toku od 60 dana od dana stupanja na snagu ovog zakona.

## Član 58.

Ovaj zakon stupa na snagu osmog dana nakon objavljivanja u "Službenim novinama Bosansko-podrinjskog kantona Goražde".

Broj: 01-02-153/02

PREDSJEDAVAJUĆI

08.04.2002. godine

Ramiz Drakovac, s.r.

Goražde

100

Na osnovu Poglavlja IV, odjeljak A, člana 32 /1/ Ustava Bosansko-podrinjskog kantona Goražde /Prečišćeni tekst/, /"Službene novine Bosansko-podrinjskog kantona Goražde", broj: 8/98/, donosim:

## U K A Z

O PROGLAŠENJU ZAKONA O IZMJENAMA  
ZAKONA O SREDNJOJ ŠKOLI

## I

Proglašava se Zakon o izmjenama Zakona o srednjoj školi, koji je donijela Skupština Bosansko-podrinjskog kantona Goražde, na sjednici 8. aprila 2002. godine.

Broj: 02-02-165/2002

PREDSJEDNIK

8. april 2002. godine

Halilović Salem, s.r.

Goražde

101

ZAKON  
o izmjenama Zakona o srednjoj školi

## Član 1

U članu 32 stav 2 iza riječi traje "38" se briše i mijenja se broj 37, u istom stavu iza riječi okviru "36" se briše i mijenja u "35".

## Član 2

U članu 102 stav 4 i se u cjelosti brišu.

## Član 3

U članu 124 iza riječi okviru "42" se briše i mijenja u "40".

## Član 4

U članu 125 iza riječi okviru "42" se briše i mijenja u "40".

## Član 5

U članu 138 stav 4 u cjelosti se brišu riječi "U ime osnivača srednje škole".

## Član 6

Ovaj Zakon stupa na snagu osmog dana od dana objavljivanja u "Službenim novinama Bosansko-podrinjskog kantona Goražde."

Broj: 01-02-154/02/02

PREDSJEDAVAJUĆI

08.04.2002. godine

Ramiz Drakovac, s.r.

Goražde

102

Na osnovu Poglavlja VI član 59 Ustava Bosansko-podrinjskog kantona Goražde ("Službene novine Bosansko-podrinjskog kantona Goražde", broj: 8/98), Skupština Bosansko-podrinjskog kantona Goražde na sjednici održanoj 15. aprila 2002. godine, donosi

## O D L U K U

O PRODAJI I PRENOSU PREUZETE IMOVINE OD  
HI "AZOT" d.j.l. VITKOVIĆI

## Član 1.

Ovom Odlukom daje se saglasnost Vladi Bosansko-podrinjskog kantona Goražde da izvrši prodaju i prenos preuzete imovine od HI "Azot" d.j.l. Vitkovići, kako slijedi:

1/ Glavna trafo stanica 35/6 kV prodaje se "Elektroprivredi BiH", a sredstva dobijena prodajom upotrijebit će se za izmirenje duga za električnu energiju HI "Azot" d.j.l. Vitkovići koji je nastao u prethodnom periodu i izmirenje zakonskih obaveza do visine dobijenih sredstava prodajom.

2/ Prostor sadašnje Pošte u Vitkovićima prodaje se J.P. PTT Saobraćaj Sarajevo za izmirenje zakonskih obaveza do visine sredstava dobijenih prodajom.

3/ Magacin objekta 117 ostaje u vlasništvu Bosansko-podrinjskog kantona Goražde i koristit će se za potrebe robnih rezervi

4/ Fudbalski stadion i Kuglana se prenose u vlasništvo Općine Goražde.

5/ Haldište sa mostom se prenose u vlasništvo Općine Goražde kao učešće Bosansko-podrinjskog kantona Goražde u finansiranju regionalne deponije smeća.

## Član 2.

Ova Odluka stupa na snagu danom objavljivanja u "Službenim novinama Bosansko-podrinjskog kantona Goražde.

Broj: 01-05-164/2002

PREDSJEDAVAJUĆI

15. aprila 2002. godine

Drakovac Ramiz, s.r.

Goražde

103

Na osnovu Poglavlja VI član 59 Ustava Bosansko-podrinjskog kantona Goražde ("Službene novine Bosansko-podrinjskog kantona Goražde", broj: 8/98), Skupština Bosansko-podrinjskog kantona Goražde na sjednici održanoj 15. aprila 2002. godine, donosi

## O D L U K U

O PREUZIMANJU IMOVINE OD HI "AZOT" d.j.l.  
VITKOVIĆI U VLASNIŠTVO BOSANSKO-  
PODRINJSKOG KANTONA GORAŽDE

## Član 1.

Ovom Odlukom Bosansko-podrinjski kanton Goražde preuzima sljedeće objekte i imovinu od HI "Azot" d.j.l. Vitkovići:

1/ Glavna trafo stanica 35/6 objekti 202 i 203a

knjigovodstvena vrijednost

800.873,60 KM